



Savognin a sanestra da la Guglia, cun las baselgias da Nossadunna e S. Martin.



Il vitg da Tinizong s'estenda per lung da la via dal Guglia.

En la part centrala dal Surses – da la culegna preistorica Padnal a la regiun da turissem

■ Il LIR fa oz staziun en las vischnancas da Savognin e Tinizong-Rona. La vischnanca da Savognin giascha en il center dal Surses e furma la chapitala economica e politica da la val. Suenter il Mot la Cresta (Padnal) maina il stradun dal Guglia tras Tinizong che furma in tipic vitg construi lung la via. Il guaud da Tinizong sparta il Surses en in stgalim inferiur (Sotgöt) ed in stgalim superior (Surgöt). L'antierira vischnanca da Rona, che tutga geograficamain tar la part superiura, ha fusiunà il 1998 cun Tinizong a la vischnanca politica da Tinizong-Rona.

Savognin (Suagnign)

Vischnanca politica, circul Surses, district Alvra. Savognin cumpigliava fin ca. l'onn 1960 tschintg gruppas d'abitadis separadas cleramain ina da l'autra e construidas lung la Guglia: S. Mitgel, Naloz, Sot Curt, Sur Curt e Sur Tocf. 1154 *Sueningin*, tudestg Savognin (uffizial, fin a l'entschatta dal 20avel tschientaner tudestg Schwei-ninggen). Il num Savognin è ina italianisa-zion litterarisada. La vischnanca furma oz il center economic e politic da la val. 1643 430 abitants; 1710 530; 1802 365; 1850 469; 1900 444; 1950 766; 1960 632; 1970 820; 2000 882.

Culegna dal temp da bronz sin il Padnal (Mot la Cresta)

Collina marcanta al sid da Savognin situda a la via dal Guglia. Abitadi important dal temp da bronz, scuvert il 1938 da Bonifaci Plaz e da Walo Burkart cun explotar gera. Empirimas exchavaziuns tras Bene-dikt Frei 1953–56. Retschertgas archeologicas sistematicas tras il Servetsch archeologic dal chantun Grischun 1971–83, dirigidas da Jürg Rageth. Runcada cun agid dal fiu e fundaziun d'ina emprima culegna en il temp da bronz tempriv (ca. 2200–1700/1600 a.C.). Successiun d'almain tschintg (parzialmain era pliras) fasas d'abitadis (orizonts surpostads A-E) u da vitgs destruids solitamain tras incen-

dis. Lunga stabilitad da l'abitadi sco era da singuls fundaments. La pli veglia culegna da l'epoca dal temp da bronz tempriv consistiva da simplas chamonettas da lain construidas sin in fundament da palissadas, probablamain cun paraids da pertgas entretschedas (dimensiun ca. 3 x 5,5 m fin 4,5 x 5,5 m). Dal temp da bronz mesaun (ca. 1700/1600–1300 a.C.) datescha in tip d'abitadi a traies retschas cun chasas cun fuainas ch'inizieschan probablamain la construcziun da travs (fragments da chaltschina da chamonas construidas cun travs). In edifizi cuntenga restanzas metallurgicas (chasa dal ferrer?). In'imposanta cisterna da laresch, construida cun pals e palancas revestigidas cun chaltschina, serviva probablamain a cumbatter il fiu ed a drenar la culegna (reservuar d'aua). A l'entschatta dal temp da bronz tardiv (ca. 13avel tschientaner a.C.) existivon gronds edifizis (ca. 20 x 6 m) che devan allochii a pliras famiglias e ch'eran medemamain ordinads tenor il tip d'abitadi a traies retschas. A las chasas d'abitar eran probablamain anc annectadas stallas ed edifizis d'economia. A partir dal temp da bronz tardiv (a partir da ca. l'onn 1000 a.C.) èn sa midadas las structuras da las chasas e dals abitadis (indizis per ina curta interrupziun da la colonisaziun). Las structuras dals abitadis laschan presumar ina concepiun architectonica generala ed in'organisaziun communabla da l'abitadi. Las exchavaziuns han mess a la glisch in'impurtanta successiun da stresas da culturas (da passa 2,5 m autezza) cun numerus objects da cheramica e divers utensils da bronz sco era artefacts dad ossa e da crap, vaschs da terracotta, perlas d'ambrä, objects osteologics, sems charvunads, chaltschina da chamonas, crustas da metal e provas da minerals. L'abitadi sin il Padnal fa part da la Cultura interalpina dal temp da bronz, derasada en il Grischun, en il Tirol dal Sid ed en la Val dal Rain Alpina. Ils abitants eran purs che vivevan da l'agricultura (dumieci, spelta,

furment, salin dubel, arvegl, evtl. avaina) e da l'allevament da muvel, nursas, chauras e portgs. La chatscha e la pestga giuvagan ina rolla subordinada. Restanzas da crustas e da metals cumprovan l'explozziun e l'elavuraziun da minerals d'arom sulfid en la vischianza dal Padnal durant il temp da bronz. Furmas da cular e fragments da chazzettas cumprovan che l'arom vegniva explotà ed elavurà ad objects da bronz en l'abitadi sez. Chatsdad ambras e numerosas restanzas da cheramica documenteschan in commerzi nord-sid sur ils pass alpins. Da l'oriund abitadi han ins exchavà radund in terz fin maximalmain la mesada tranter il 1971 ed il 1983. Sin fundament da la clera structura da l'abitadi pon ins calcular per la culegna dal temp da bronz in dumber da 40–50 (il pli vegli abitadi) fin maximalmain 80–90 abitants. *Jürg Rageth*

Dal temp roman fin al temp actual
Ils chats dal temp roman stattan bain en connex cun las rutas dal Set e dal Guglia. La curt da Savognin appartegneva probablamain als bains da la claustra da Mistail. Il 1154 è quella vegnida affidada a la claustra da S. Gliezi a Cuira, cun la resalva dals dretgs episcopals; il 1282 è ella dentant puspè passada a l'investigie ch'aveva plazza ses podestat en la vischnanca vischiana da Riom. Il 1552 è sa cumprà liber il cummin dal Surses (cun il vischinadi da Savognin) dals dretgs feudals. Il 1487 è sa separada la baselgia da S. Martin, attestada il 1370, da la baselgia principala da Riom. La pastoraziun han exercitò dal 1649–1942 ils paders chaputschins ch'han era administrà in ospizi dapi il 1660. La baselgia parochiala da Nossadunna è vegnida consecrada il 1643, quella da S. Mitgel è vegnida renovada il 1663, quella da S. Martin il 1677. Fin enturn il 1960 han pratitgà ils abitants da Savognin surtut l'agricultura e l'allevament da muvel. Cun la construcziun da la via dal Guglia (1834–40) è sa sviluppà in traffic da

transit ed in turissem da vacanzas moderà (dus hotels enturn il 1870), ils blers gievant dentant anc adina a lavurar sco stagiunaris en l'Engiadina. Meglieraziun ed arrundaun dal funs 1942–46. Indrizs da transport, oravant tut per il turissem da skis, a partir dal 1962. Il boom da construcziun ha durà fin il 1974, la populaziun è creschida, ed ins ha pudì stgaffir novas plazas da lavour. Grazia al turissem offra Savognin a l'entschatta dal 21avel tschientaner lavour d'enviern era a purs, stagiunaris e pendularis. Il 2005 lavouravan 64 % da las personas cun activitat da gudogn a Savognin en il secur terziar. Letgs d'hotel 2009/10: 599; pernottaziuns en hotels: 89 235. Part da la populaziun da lingua rumantscha: 1941 81,1% (lingua materna); 2000 53,1% / 70,1% (meglra lingua / tuttas indicaziuns). *Jürg Simonett*

Tinizong-Rona

Vischnanca politica, circul Surses, district Alvra, sortida il 1998 da la fusiun da las antieriras vischnanças politicas da Tinizong e da Rona. Part da la populaziun da lingua rumantscha: 2000 50,1% / 68,3% (meglra lingua / tuttas indicaziuns).

Tinizong

Anteriura vischnanca politica, circul Surses, district Alvra, situada a la via dal Guglia, fusiunada il 1998 cun Rona a Tinizong-Rona, tudestg Tinzen (fin il 1943). 1850 413 abitants, 1900 408; 1950 409; 1990 281. L'*Itinerarium Antonini* menziunescha in *Tinetione* sco staziun a la ruta romana per il Set. Dal temp medieval fin viaden il 19avel tschientaner è Tinizong stà in lieu da susta dal port Surses (corporaziun da transport). En il temp carolingic era Tinizong ina curt roiala, en il temp curretic han existì qua traies turs da defensiun (oz sparidas). Sedia dals signurs de Tinizong e dals de Marmels. La baselgia da S. Plasch, attestada per l'emprima giada il 1180, posseda dapi la renovaziun en stil gotic-tardiv (1512) in altar cun alas (tripticon). Il 1610 ha in incendi devastà il lieu. La baselgia è vegnida reconstruida il 1663 dals chaputschins activs a Tinizong a partir dal 1634. Dal temp da bronz fin a la Segunda Guerra mundiala han ins exploitò mangan en la Val d'Err, trantner auerter ils rars Tinzenit, Parsettenit e Sursassit. L'antierira vischnanca purila cun gudogn supplementar dal transport da martganzia dispona oz d'insatge kommerzi, da dus hotels e d'ina gronda culegna da chasas da vacanzas. Dapi il 1953 sa chatta a Tinizong la centrala da Murmarera da las Ovras electricas Turitg. Las vischnanças da Tinizong e da Rona èn restadas ecclesiasticamain separadas era suenter lur fusiun.

Gion Peder Thöni

Pensa

Aclau ed abitadi da stad (vischnanca da Tinizong), situà sin 1668 m al Ragn d'Err al vest da Tinizong. En il temp medieval

furmava Pensa ina culegna permanenta, a la quala appartegnevan probablamain era ils bains da Tgasot, Demat e Tgamatga. La colonisaziun stat probablamain en connex cun l'explozziun da minerals, effectuata durant il temp medieval en la regiun da la Val d'Err. Il 1280 è attestà in Peter von Err. L'ospizi da S. Peder sin il Pass dal Set incassava tschains dals abitants da la Val d'Err. Il 1477 stevan là ils ertavels d'in Parcifall da Pensa che furnivan chaschiel a S. Peder. Anc il 1512 èn attestads a Pensa per num quatter subdits da l'ospizi.

Martin Bundi


Rona

Anteriura vischnanca politica, circul Surses, district Alvra, fusiunada il 1998 cun Tinizong a la vischnanca politica da Tinizong-Rona. La vischnanca da Rona a la via dal Guglia consista da Ruegnas, situà sin ina terrassa, e da Rieven, situà a l'ur d'ina planira alluviala da la Guglia. Rieven sa chattava antruras, sco l'aclau da Livingzutterr d'ina bova, a sanestra da la Guglia ed è vegnì translocà en consequenza da las auazuns permanentas. 1330 *Rouenam*, 1377 *Rouvena*, 1412 *Rofna*, tudestg Roffna. 1850 131 abitants; 1900 88; 1950 121; 1980 29; 1990 58. Rona era in lieu da passadi a la ruta romana e medievala dal Set per part anc oz visibla. Pir en il 12avel–13avel tschientaner han ins urbarisà e colonisà la regiun, probablamain en connex cun l'explozziun da metals sin l'Alp Plaz tras ils signurs de Marmels e cun la construcziun da la via charabla dal 1387. Ecclesiasticamain ha appartegni Rona a Tinizong fin il 1907 e furma dapi alura in'atgna pravenda. In'emprima baselgia è menziunada il 1444. Durant la reformaziun è Rona restà fidaivel a la cardientscha catolica. La baselgia odierña, deditgada als ss. Antoni e Leonard, è vegnida erigida dals chaputschins il 1663 (menziun speziala merita l'orgla dal 1675). Il project d'in lai da serra en la planira (1912) n'è betg vegnì realisà. Rona furmava a ses temp ina vischnanca dal cummin da Surses. Il 1851 è daventà Rieven sut il num Rona in'atgna vischnanca politica; Ruegnas appartegneva a Tinizong ch'ha refusà la fusiun cun Rona il 1910, cumbain ch'i deva a Ruegnas ina baselgia ed ina scola cuminaivla. Rona viva oz oravant tut da l'allevament da muvel, da l'artisanat e dal turissem.

Gion Peder Thöni

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istoria grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lit.ch; versiun stampada: www.casanova.ch u en mintga librarria.



Tranter il 1886 ed il 1894 ha l'artist Giovanni Segantini vivi e lavorà a Savognin. (Maletg dal 1888 cun Savognin davosvart). FOTO PD